

朔

方

備

乘

朔方備乘卷第十七

考十一

錫伯利等路疆域考敘

錫伯利路

高加索路

臣秋濤謹案論地利者重險要形勢務治理者
徵德教源流觀於俄羅斯東土錫伯利路可見
也俄羅斯地分兩土就彼國言之西土波羅的
等路固爲根本要地而就中國邊防言之則東

土錫伯利路切近卡倫尤不可忽自古丁零堅
昆鐵勒諸部形勢無聞於史冊蓋緣匈奴突厥
跨據朔漠幽都地遠難達中華旣未接於封疆
自罕知其風土西洋人好談地理而登都韃靼
得自傳聞殊多謬誤之語他可知矣恭遇

聖朝宅中圖大悉主悉臣東海索倫歸順於前喀部
準夷疆理於後凡此諸地咸與錫伯利路鄰境
用能設畛繪圖補亘古黃圖所未悉猗歟盛已
抑不僅此也戴斗惟尙武功自昔不諳聲教三

代以後惟唐太宗威震北海咸設羈縻郡縣此
錫伯利路聲教之一通也既而默啜再起回統
強盛又復隔絕元太祖開拓其地封建親藩此
錫伯利路聲教之再通也無何尾大不掉尋干
戈者五十餘載至明更以荒外視之職是故也
我

聖朝德化覃敷殊俗賓貢於是錫伯利之人始得因
俄羅斯以觀光

上國旣而

朔方備乘

卷十七

金代和等路屬地考索

二

命將致討震曜以武功設館育才

訓迪以文教在俄羅斯舉國眾庶無不感沐

鴻慈而錫伯利附近中國霑被尤速至今日則冰海以

南金山以北咸獲父安各務絃誦斯皆二百年

來涵泳

聖澤之所致蓋

聖朝修德徠遠之效彰彰如此豈往代帝王所能企

及萬一哉臣謹考古證今略具梗概庶足以宣

德意而備披尋至若高加索路乃安息舊壤地屬亞

細亞附著於後用備參稽其尼布楚城雖現在亦屬錫伯利路而事迹較繁前已別自爲卷茲不複載云

錫伯利路總載

臣秋濤謹案錫伯利路本鮮卑舊壤故有錫伯之名考漢書匈奴傳云黃金犀毗一顏師古注曰犀毗帶鉤也亦曰鮮卑語有輕重耳據此知鮮卑音近錫伯今黑龍江境有錫伯一種亦作席伯亦作席北旣非索倫亦非蒙古卽鮮卑遺

民也此路在俄羅斯屬境各部中最爲廣大一
統志四裔考異域錄並作西畢爾斯科南懷仁
圖作西北里亞一作細密里亞總記作悉比釐
阿又作西北里阿海國圖作悉畢爾斯科又作
細密里志略全志並作西伯利志略又作悉比
釐又作西卑里亞與備考同海國聞見錄作細
密里也顚林圖說作什卑釐國大地全球說作
什卑釐也又作悉畢爾亞又作昔白利牙皆一
地也其疆域東至堪察加海北至北海西接大

俄喀山諸路南與中國接界在吉林黑龍江庫
倫烏里雅蘇台科布多塔爾巴哈台伊犁各將
軍大臣所轄境外居中國藩屬索倫達呼爾俄
倫春畢喇爾布拉特巴爾呼喀爾喀蒙古車臣
汗土謝圖汗唐努山烏梁海阿爾泰諾爾烏梁
海阿爾泰山烏梁海左哈薩克右哈薩克北哈
薩克安集延布哈爾諸部落之北漢爲堅昆丁
零烏揭諸國又爲匈奴北境後漢爲鮮卑北境
後魏爲烏洛侯大鮮卑諸國地又爲蠕蠕北境

周齊隋時爲契骨諸國及突厥西突厥北境唐初爲鐵勒流鬼骨利幹都播僕骨同羅拔野古多濫葛斛薛阿跋鞠國俞於大漢白晝結骨駿馬鬼國鹽漠念驅度寐拔悉彌諸國初隸突厥後屬薛延陀又屬回紇太宗時置狼山瀚海各都護府領仙萼元闕等州自漠北抵北海皆爲羈縻郡縣其後爲黠戛斯及木馬突厥所據遼爲轄戛斯及乃滿部地金爲乃蠻克烈諸部地元設謙州益蘭州又爲昂可刺撼合納烏斯吉

利吉思諸部地後爲叛王海都等所據用兵五十餘年乃降明時阻於朔漠未通中國利瑪竇地圖有墨文元亞登都國門臥耳羅荒野亞馬是理諸名艾儒略職方外紀圖有登都國其里目西國韃而靼單務得諸名南懷仁坤輿圖有等都達賴爾猛護爾單護得伯爾轄亞泥比加爾里把兒獲那穰加福那毋都喜加辣諸名案其所圖皆在錫伯利路境內然其事蹟不詳於史冊疆域亦茫昧難考大抵元時分封諸王於

此元政既衰土番仍自起割據各設頭目不相統攝旣而俄羅斯興於西方錫伯利遂爲所服屬先是元太祖長子朮赤之裔封於俄羅斯世膺王爵有大俄諸部地旣而俄羅斯復興逐去朮赤之裔之爲王者國號俄羅斯自稱爲汗國人稱之曰察罕汗亦曰察爾都於莫斯科窪猶未得錫伯利寸土也嗣是俄羅斯之商舶於冰消時駛至錫伯利海岸以洋貨易皮貨與其頭目日漸狎熟盛誇俄羅斯之富強各頭目惑焉

間有率其屬人至俄者睹其國都市臺榭之間壯麗傾心歸向各部競相傳播咸願歲貢方物爲藩屬俄羅斯遂於烏彌河海口建磯台扼險要以控制之漸徙罪人供力役築城戍於是錫伯利西方諸部不費兵力咸爲俄有初蒙古之裔旣失大俄地猶據喀山及阿斯達拉干等處沿佛爾格河至裏海皆游牧部落也俄羅斯之伊挽王及洼爾西王益治兵攻戰盡取喀山及阿斯達拉干諸地蒙古人皆東走俄人駐兵於

阿鄰堡地防之有庫程汗所屬之塔塔拉部落居托波兒俄兵破降之又有蒙古頭目耶爾麻者率部衆六千餘人東據錫伯利地欲自立國而力不敵仍臣服於俄羅斯耶爾麻旋爲其部下所殺俄羅斯取其地於是俄羅斯王移駐防阿鄰堡之兵闢地而東至伊聶謝地一作華尼西阿其居民曰儻俄斯族一作通古斯亦曰喀木尼漢卽索倫別部也其俗使鹿土沃民湊俄兵甫至爭貢皮毳復循昂噶拉河溯流而南其

居民曰模臘斯蒙古猛勇異常蓋卽黑龍江之索倫也俄羅斯憚於前進改道北略循列訥河東而行崎嶇冰雪跋涉多阻旣而端可薩之兵不畏冰雪往來其地至

大清崇德四年有端可薩之彌特厘者直至東洋荷葛斯海岸偵探道路復增兵前往昂噶拉河以及白哈爾湖遠近之地無不攻取遂得厄爾庫城巴爾古錫穆城楚庫拜商烏德拜商伊談珠拜商伊拜商各地南界始與喀爾喀接壤由是

車臣汗部土謝圖汗部皆與之市易得其鳥鎗以入貢焉自後俄羅斯復南侵據蒙古舊屬之尼布楚城旋於順治初年俄國所屬之羅刹來擾我黑龍江所屬之雅克薩呼瑪爾等處羅刹即可薩之音轉也屢經

大兵征討頻奏克捷順治十二年察罕汗遣使入貢

世祖章皇帝賜敕諭之自後屢貢獻而羅刹仍寇黑龍江等處如故索倫等部皆不獲安

聖祖仁皇帝旣平三藩乃經營東北邊地

命將出師勦撫兼施遂於康熙二十二年設黑龍江將

軍二十四年克復雅克薩城虛其地不戮羅刹

一人悉遣歸國二十五年羅刹再築雅克薩城

大兵復進圍之察罕汗上疏乞撤圍定界遂於康

熙二十八年

欽差大臣索額圖等與俄國使臣費岳多羅等定議立

碑事詳

平定羅刹方略俄羅斯自是固守邊疆撫其所得之地

復於康熙三十九年取得甘查甲地而錫伯利
東方諸部咸隸俄羅斯矣案海國聞見錄細密
里也本境當止轄托波兒附近之地俄羅斯設
噶噶林於此總理東方後來所取之伊聶謝尼
布楚以至甘查甲地遂概名爲錫伯利路其地
東西長一萬三千餘里南北寬約五千餘里境
土大於歐羅巴一洲綜錫伯利全土東部所產
惟皮貨專運至恰克圖售於中國西部兼產五
金之鑛泰西諸國咸仰給焉康熙年間曰西畢

爾斯科爲八道之一乾隆末年分所屬爲都莫司等四部嘉慶年間分爲德波爾等八部道光初年改爲鎮四會城二郡二道光末年爲錫伯利路仍統八部

全境八到

東至堪察加海
南至中國喀爾喀四十七卡倫及

科布多塔爾巴哈台並伊犁將軍所屬哈薩克回部界

西至大俄喀山二路界
北至北海

東北至郭爾噶海
東南至中國吉林黑龍江二省界
西南至北哈薩克及安集延諸國

界

托波爾

臣秋濤謹案托波爾錫伯利路所屬八部中之

首部也一統志四裔考所載並同此名異域錄

作托波兒內府圖作托博爾城理藩院則例作

托博勒城總記作都莫斯又作都莫司志略作

德波爾斯科備考作德波爾斯各鎮全志作德

波斯科龍沙紀略作脫博斯奇皆一地也本唐

都播國地亦作都波距今千載其名固相沿未

易也新唐書引賈耽所記中受降城入回鶻道
云中受降城正北如東八十里有呼延谷谷南
口有呼延柵谷北口有歸唐柵車道也入回鶻
使所經又五百里至鷓鴣泉又十里入磧經廢
鹿山鹿耳山錯甲山八百里至山齋子井又西
北經密粟山達旦泊野馬泊可汗泉橫嶺綿泉
鏡泊七百里至回鶻衙帳又別道自鷓鴣泉北
經公主城眉間城怛羅思山赤崖鹽泊渾義河
爐門山木燭嶺千五百里亦至回鶻衙帳東有

平野西據烏德鞬山南依喚昆水北六七百里至仙娥河河北岸有富貴城又正北如東過雪山松樺林及諸泉泊千五百里至骨利幹又西十三日行至都播部落又云骨利幹都播二部落北有小海赤堅時馬行八日可度海北多大山其民狀貌甚偉風俗類骨利幹晝長而夕短診察方隅是都播在骨利幹之西處小海之南正與托波爾疆域符合異域錄言西畢爾斯科之總管官號噶噶林者駐此四裔考曰凡通市

諸物有噶噶林印記者准市餘則不理藩院則
例曰俄羅斯行中國之公文用俄羅斯國薩那
特衙門及托博勒城守尉印信蓋俄國諸路惟
錫伯利地域最鉅其方面之任亦惟托波爾城
之噶噶林權寄最專志略云俄有大酋駐多木
斯科總理東方蓋誤以托波爾爲多木也托波
爾轄大小邑三十有九西境與大俄路之亞干
日窩祿那及喀山路之白爾摩等部相連以烏
拉嶺爲界地氣寒甚產金銀銅鐵錫五穀皮貨

馬酒材木脂膏乾隆末年爲悉畢厘阿四部之首部嘉慶年間爲八部之一道光初年爲四鎮之一道光末年仍爲錫伯利路八部之首部而分設將軍駐此總理西方三部之政事云

全境八到

東至雅庫部界
南至托穆斯科部界

山西至大俄路所屬窩祿那部及喀山路所屬白爾摩部界

北至北海

東北至雅庫部界

東南至伊犁謝斯科部界
西南至多木斯科部界

西北至大俄路所屬亞干日部界

多木斯科

臣秋濤謹案多木斯科錫伯利路所屬八部中之一部也志略全志所載並同此名南懷仁圖作都問內府圖作都問城異域錄作圖敏海國圖作土鄰邑志略云一作多僕備考作多木斯各鎮皆一地也圖理琛言自托波兒起程由厄爾齊斯河向西南入托波兒河溯流越九宿至圖敏沿途皆塔塔拉之人挽緯岸旁林木叢密無緯路俱行泥水之中俄羅斯兵丁猶加笞楚

催促到彼之日管柏興官排列旗幟兵丁迎接
款宴復餽送食物供給俄羅斯出征擄來之西
費耶國人亦安置於此自此西北由土拉河溯
流五百餘里抵鴉班沁地方捨舟陸行蓋多木
斯科地居托波兒河土拉河之間在托波爾城
西南亦一都會也元史速不台征斡羅思之後
移家禿拉河上禿拉河當卽此土拉河與土謝
圖汗境內之土拉河名同地異不可不知其疆
域南皆沙漠與西域之哈薩克回部毗連哈薩

克等以游牧剽斂爲俗時來侵掠有北哈薩克部尤強効俄羅斯雖有防兵不能禁也五金之鑛最多專設官以督理鑛務乾隆末年爲托波兒屬地嘉慶年間設部爲八部之一道光初年爲四鎮之一道光末年屬錫伯利西路隸托波爾城將軍統轄

全境八到

東至托穆斯科部界
南至沙漠接北哈薩克國界

西至東俄路所屬之阿鄰堡部界

北至托波爾部界

東北至托波爾部界
東南至哈薩克國界

西南至北哈薩克國界
西北至喀山路所屬之白爾摩部
界

托穆斯科

臣秋濤謹案托穆斯科錫伯利路所屬八部中之一部也四裔考及異域錄所載並同此名內府圖作托穆斯歸斯歸卽斯科之異文總記作科利弗志略全志並作疴慕斯科志略云一作東色備考作疴慕斯各皆一地也其地在金山之北古黠戛斯地後爲吉利吉思部地元太祖

取之後爲北邊諸王海都等所據諸王旣降命
將屯田於此地頗豐饒俗善釀酒人多沉湎康
熙年間準噶爾未平使臣圖理琛經此言其地
爲俄羅斯及策妄阿拉布坦與哈薩克國哈拉
哈兒叭國四國交界今案此地南境與烏梁海
接界是時阿爾泰諾爾烏梁海尙爲策妄阿拉
布坦屬部故圖理琛云然也其地居民有塔塔
拉及巴爾巴忒二種舊與俄羅斯及策妄阿拉
布坦兩國納賦仍苦哈薩克人自西南來時肆

侵略今則地屬俄羅斯與中國唐努山烏梁海接壤邊境之事中國以科布多塔爾巴哈台諸大臣莅治之地在伊轟謝之西志略云在也尼塞東誤也轄大小城十產金銀銅鐵鉛乾隆末年爲悉畢厘阿四部之一嘉慶年間爲八部之一道光初年爲兩會城之一道光末年屬錫伯利西路隸托波爾城將軍統轄

全境八到

東至伊轟謝斯科部界
南至中國所屬唐努山烏梁海部

界

西至多木斯科部界

北至托波爾部界
東北至雅庫部界

西南至中國所屬卡倫界
梁海及哈薩克各部界

西北至托波爾部界

額爾口城

臣秋濤謹案額爾口城錫伯利路所屬八部中之一部也綏服紀略所載同此名內府圖作伊爾古斯歸城異域錄作厄爾庫又作額爾庫又作厄爾口海國圖作額爾古克城志略作義爾古德斯科一作耳谷備考作義爾古德斯各鎮

全志作義古斯科大地全球說作阿爾古克龍
沙紀略作尼爾苦斯皆一地也古匈奴北境丁
零國地厥後鮮卑突厥諸國遞有其地唐時爲
鞠國亦曰械部元爲昂可刺部東南境明爲加
大閣辣東南境

大清崇德年間俄羅斯侵有其地疆域處伊聶謝之
東城在柏海爾湖之西北一百五十餘里西臨
昂噶拉河有額爾口河自西南來入之故城以
水名地廣大出銀鉛礦兼產皮貨每年所得鉛

與皮甚多足助國用其人多美風姿頗講文學
南境抵外興安嶺與中國所屬喀爾喀蒙古土
謝圖汗車臣汗兩部接壤康熙年間俄羅斯設
總管於此南界有甲他城與中國所設恰克圖
市集相距一里許中國與俄羅斯人互市於此
雍正五年

欽派大臣會同俄國使臣分定界址建設卡倫始立貿
易章程理藩院專派司員管理仍歸庫倫大臣
稽察乾隆末年俄國總管移治雅庫以額爾口

爲屬地嘉慶年間額爾口爲八部之一道光初年爲四鎮之一道光末年仍爲錫伯利路八部之一而分設將軍駐此總理東方五部之政事云

全境八到

東至雅庫部界
南至楚庫河接中國所屬各卡倫

界

西至伊聶謝斯科部界

北至雅庫部界

東北至雅庫部界
東南至中國所屬車臣汗部界
西南至中國所屬土謝圖汗部界
西北至伊聶謝斯科部界

伊聶謝斯科

臣秋濤謹案伊聶謝斯科錫伯利路所屬八部
中之一部也一統志四裔考異域錄並作伊聶
謝柏興內府圖作惹尼色斯歸城總記作華尼
西阿志略作也尼塞斯科一作云益士備考作
也尼塞斯各全志作也尼斯科皆一地也古匈
奴北境鮮卑突厥諸國遞有其地唐爲骨利幹
國地元爲昂可刺部地明時曰加大閣辣卽昂
可刺之音轉喀木尼堪部居此俄羅斯兵自托

波爾闢地而東至伊聶謝喀木尼堪部眾皆降
遂收其地建柏興設管柏興官治之其地在額
爾口城之西北有中國發源之色楞格河北流
稱爲柏海爾湖又北流爲昂噶拉河自額爾口
城西北流至伊聶謝柏興東南又有中國發源
之大克穆河北流爲伊聶謝河亦至柏興東南
與昂噶拉河合而北流注北海內府圖作惹尼
色河一作惹尼色斯河或作因尼西河或作日
尼塞亞河或作日尼塞河皆伊聶謝譯字之音

轉詳見色楞格河源流考篇內此地在托穆之東志略誤以爲在疴慕西因謂北接德波爾南接哈薩克皆誤也其疆域南與中國所屬之喀爾喀蒙古及烏梁海諸部接壤康熙中使臣圖理琛由額爾口城舟行三千餘里經伊聶謝柏興至柏興西北二十里外烏斯乞木地方登岸陸行乘馬過麻科佛斯科嶺至揭的河復乘舟達托波爾此水路也及其歸時由托波爾陸行三千七百餘里至托穆斯科又東北行一千六

百里抵伊聶謝柏興又東南行二千餘里至伊
里穆城又千餘里至額爾口此陸路也是伊聶
謝爲水陸要衝康熙時僅設柏興駐兵八百名
乾隆末年爲雅庫屬部嘉慶年間建爲伊聶謝
斯科列八部之一駐兵四千名道光初年爲四
鎮之一道光末年屬錫伯利東路隸額爾口城
將軍統轄

全境八到

東至額爾口城部界
南至中國所屬各卡倫及烏梁海

部界
西至托穆斯科部界

東北至北海

東南至雅庫部界

西南至中國所屬各卡倫界

西北至托波爾部界

雅庫

臣秋濤謹案雅庫錫伯利路所屬八部中之一部也

聖祖仁皇帝聖訓內載此地名內府圖作惹鞠斯歸城莊廷萼地圖作惹芻總記作雅古薩志略作亞古德斯科一作牙谷備考作亞古德斯各全志

作亞古斯科皆一地也古爲匈奴東境唐爲鞠國北境明爲加大闔辣以東地俄羅斯兵旣取伊聶謝溯昂噶拉河而上至額爾口城又北循列訥河取得此地其城東濱列訥河疆域廣遠北至冰海寒威凜冽冰雪之消融者每歲止得三四月人戶稀少射獵之外無生計俄人取其所得之皮以供賦稅其南界抵外興安嶺與黑龍江接壤尼布楚城屬焉康熙年間羅刹擾邊侵及黑龍江雅克薩等處屢奉

聖諭令其速回雅庫卽此地也嗣於康熙二十八年奉
旨議定疆界立碑於格爾必齊額爾古納河等處界碑
之外皆屬此部所轄領大小城五十有三土產
皮貨之外惟銀鉛凡俄羅斯駐防錫伯利兵共
二萬二千駐托波爾者半駐雅庫者亦半派守
各口礮臺者十之六派守南界者十之四皆以
端可薩部人充伍乾隆末年雅庫爲悉比釐阿
四部之一設大頭目駐此嘉慶年間爲八部之
一道光初年爲兩會城之一道光末年屬錫伯

利東路隸額爾口城將軍統轄

全境八到

東至甘查甲部界
南至中國黑龍江省界

西至伊聶謝斯科部界

北至北海

東北至郭列穆斯科部界
東南至中國吉林省三姓副都統

所屬地界
西南至中國呼倫貝爾城界

西北至北海

郭列穆斯科

臣秋濤謹案郭列穆斯科錫伯利路所屬八部
中之一部也內府圖作郭列穆斯歸城海國圖

作燭惡砥族志略作疴哥德斯科一作阿谷備
考作疴哥德斯各全志作疴哥斯科皆一地也
地濱北海唐駿馬國所居其極東北海隅則唐
夜叉國地也唐書記駿馬土境東西一月行南
北五十日行地近北海與此部疆域相合又言
地嚴寒每冬積雪樹木不沒者纔一二尺今其
地寒冽過於雅庫知史所載不誣至其東北海
隅與北亞墨利加洲相近北亞墨利加洲舊俗
殺人祭魔與夜叉國噉人之俗正同自天主教

行而惡俗漸革矣土人亦以獵獸爲生俄羅斯
自雅庫進兵略地於

大清崇德四年直抵東洋荷葛斯海岸由是收郭列
穆斯科地設官以賦其皮並築城海濱與海東
各島通商以收皮貨乾隆末年爲雅庫屬地嘉
慶年間建爲郭列穆斯科列入部之一道光初
年爲兩郡之一道光末年屬錫伯利東路隸額
爾口城將軍統轄

全境八到

東至郭爾噶海
南至大拉該海接甘查甲及雅庫

二部界
西至雅庫部界

東北至冰海

東南至甘查甲部界

西南至雅庫部界

西北至冰海

甘查甲

臣秋濤謹案甘查甲錫伯利路所屬八部中之一部也總記所載同此名內府圖作噶穆薩特喀城志略備考並作岡札德加全志作堪察加皆一地也其地斜伸入海形如大刀頭三面皆

抵大海惟西北一面與鄂列穆斯科部相接卽唐時流鬼國地也唐書言流鬼在北海之北北至夜叉國餘三面皆抵大海南去莫設靺鞨船行十五日莫設靺鞨卽今庫葉島與甘查甲部隔海南北相望俄羅斯於康熙三十九年始取得甘查甲部斗出大洋風土迥異似別有天地其東之少南卽日本國所屬之薩牙蓮島熬斯梭島正東邊界則與歐羅巴濱海諸國相連地處極邊俄羅斯屯兵甚眾東洋遙遠北海阻冰

或行數日無人煙河道紓曲荒遠萑苻出沒貿易跋涉艱難無匹徒以產豐利厚故商旅不絕冒險爭駕甘查甲物產尤富運至雅庫征稅甚輕其地終年寒冽草木稀疏海鳥翔集如蠅蚋內有火山十座吐燄不息地常震動居民捕魚爲食衣以魚皮穴地而居身體猥瑣用犬若馬俄羅斯人設口收皮頭目有重罪者流竄於此乾隆末年爲悉比釐阿四部之一嘉慶年間爲八部之一道光初年爲兩郡之一道光末年屬

錫伯利東路隸額爾口城將軍統轄

全境八到

東至堪察加大海
南至大洋海

西至大拉該海
北至郭列穆斯科部界

東北至堪察加大海
東南至大洋海

西南至大拉該海
西北至郭列穆斯科部界

新錫伯利三島

臣秋濤謹案新錫伯利一作新西卑利一作新
西卑里一作新西卑里亞皆一地也又名列哥
富乃北洋中巨島俄羅斯取其地名之曰新錫

伯利凡三島相連地極廣大在雅庫所屬列訥
河入海處東北海中備考以爲二島全志圖列

三島今從全志幅員戶口未詳

全境八到

東至冰海

南逾冰海

接雅庫部界

西至冰海

北至冰海

東北至冰海

東南逾冰海

至郭列穆斯科部界

西南逾冰海

至雅庫部界

西北至冰海

古里利羣島

臣秋濤謹案古里利羣島一作古里利亞斯爲

島二十有五在甘查甲部之南隔海相望備考
稱諸島皆在疴各度斯各海卽堪察加海也地
多火山爲日本國與俄羅斯互市之地土產狐
狸貂鼠兔獺之類珍寶繁衍五金之鑛甚多

羣島八到

東至大洋海
南至大洋海

西逾海至中國所屬庫葉島界
北逾海至甘查甲部界

東北至堪察加海

東南至大洋海

西南逾海至日本國屬島界
西北至大拉該海

高加索路總載

臣

秋濤謹案高加索路因高加索山爲名亦作

高架所亦作告甲俗亦作高加薩斯據艾儒略
南懷仁之說皆謂高架所山爲歐羅巴境以東
極高之山又西人以天下輿地分隸五洲而高
加索山列入亞細亞洲故今敘次是地附於錫
伯利部之後其疆域在兩海之間東裏海西黑
海也漢爲康居南境安息北境唐爲突厥可薩
部南境波斯大食二國北境元爲阿速國東境
太祖滅之以封朮赤明時有阿速國及阿斯達

拉干惹鹿惹也諸國各據一隅阿速有其西北近黑海地阿斯達拉干有其東北近裏海地惹鹿惹也有其南境地明嘉靖間俄羅斯始盛遂併阿斯達拉干而是時阿速地併入土耳其實國惹鹿惹也地併入波斯國於是高加索一區遂爲三大國連年攻戰之所康熙年間使臣圖理琛記自阿斯塔爾汗卽阿斯達拉干之西南一帶皆興安山嶺過此向西行百餘里俱係圖里耶斯科國王拱喀爾汗所屬圖理耶卽土耳其國拱喀

爾汗乃汗名後來記述家誤以控噶爾爲國名皆因此致譌案俄羅斯與土耳其構兵凡二次初次在康熙年間異域錄言俄羅斯國取拱喀爾汗之阿藻城至康熙五十三年二國講和還其阿藻城自阿藻城東北盡入俄羅斯國此初次構兵之事也二次構兵則在乾隆中年維時俄羅斯女主秉權戰攻甚銳土耳其衰機甫兆兵力猶強勝負之數大略相當自乾隆五十四年俄羅斯屢戰克捷土耳其失地喪師頻割屬

城以資講解由是阿速舊壤及薩加社等處悉爲俄羅斯所有俄國又攻克波斯之附庸諾尼阿部已而波斯所併之惹鹿惹也卽日爾日部亦皆入於俄羅斯幅員之大益洸洋於西國矣乾隆末年曰俄羅斯南新藩統薩加社納希斯丹諾尼阿阿斯達拉干阿鄰堡五部嘉慶年間曰高加索南新藩部新增日爾日部而納希斯丹併入焉仍統五部道光初年阿斯達拉干阿鄰堡二部別爲東方之鎮而高加索等地分爲

部八會城一道光末年爲高加索路凡統九部

全境八到

東至裏海
南至波斯國及土耳其國界

北至東俄路及南俄路所屬各部

界

東北至東俄路所屬之阿斯達拉

干部界

東南至波斯國界

西南至土耳其國界

西北至南俄路所屬各部界

高加索

高加索高加索路所屬九部中之首部也志略
全志所載並同此名坤輿圖作高架所總記作

高加薩斯或作告甲俗備考作高加索會城皆一地也元時爲阿速屬地明以來高加索山南北並屬土耳其所轄土番種類犷悍異常近年俄羅斯割取其地備考曰緯度自赤道北四十五度起至四十五度止經度自佛郎西國東三十五度起至四十七度止東枕加斯比約海西連西爾加西亞地南接高加索山北界黑海長約二千餘里寬約七百二十里地面積方約四萬五千里煙戶一億三萬口境內山嶺綿亘峯巒

層疊地多鴻鹵其宜稼之地則隴畝腴穀果
豐茂土產蠟蜜牛狐貂鼠海虎各皮地氣溫和
人安物阜首部名斯達窩羅波爾乾隆末年爲
薩加社諾尼阿日爾日三部屬地道光初年改
設高加索會城道光末年屬高加索路

全境八到

東至裏海

南至高加索山

西至薩加社部界

北至阿斯達拉干部界

東北至阿斯達拉干部界

東南至薩加社部界

西北至加底里諾部界

西南至明哥里部界

日爾日亞

臣秋濤謹案日爾日亞高加索路所屬九部中

之一部也備考所載同此名南懷仁圖作日入

阿的亞海國聞見錄作惹鹿惹也志略全志並

作日爾日志略又作熱阿義皆一地也志略誤

以惹鹿惹也爲波蘭國別名音既不近且覈之

方隅里到亦皆不合其誤顯然案海國聞見錄

載惹鹿惹也一國亦不通海東傍裏海西傍死

海北聯俄羅斯南接東西多爾其女人姿色美

而毛髮紅氣味臭衣著同白頭貢於包社詳其
地域寔卽日爾日亞譯字偶殊蓋康熙年間尙
自爲一國附於波斯包社卽波斯也其後爲波
斯所併仍以日爾日爲部名至嘉慶十八年波
斯與俄羅斯構兵敗績割北境之日爾日部以
請和於是日爾日亞地隸俄羅斯矣其地西距
諾尼阿東距裏海跨高加索山之南北民俗與
諾尼阿同備考曰緯度自赤道北四十度起至
四十二度四十八分止經度自佛郎西國東四

十一度起至四十五度止東至是爾彎地暨加斯比約海西枕黑海暨亞爾美尼亞地南接土耳其基亞白爾西亞二國北界高加索山長約一千里寬約六百餘里煙戶三億口境內崇山峻嶺絡繹不絕田土肥腴穀米豐稔草木禽獸甚屬繁茂地氣參差寒署俱極技藝庸陋貿易清淡首部名的非利斯志略作得勒全志作得非勒相傳內有靈泉可療疾病俄之大臣駐此統轄城舊卑陋俄羅斯修飾之漸改觀矣嘉慶年

間始建此部爲高加索五部之一而省納希斯
丹部蓋併入諸部中也道光初年日爾日爲南
新藩道光末年隸高加索路

全境八到

東至裏海

南至波斯國界

西至諾尼阿部界

北至薩加社部界

東北至納希斯丹部界

東南至是爾彎部界

西南至諾尼阿部界

西北至義米勒多部界

義米勒多

臣

秋濤謹案義米勒多高加索路所屬九部中

之一部也志略備考全志所載並同此名備考
曰義米勒多在亞細亞洲之西黑海之濱岡陵
重疊峯巒參天平原甚多沃壤寥寥土產穀果
木料等物魚類充斥土人弗取地氣溫和人安
物阜首部名古泰西嘉慶年間未設部落道光
初年爲南新藩道光末年隸高加索路

全境八到

東至日爾日亞部界
南至諾尼阿部界

西至黑海
北至明哥里部界

東北至薩加祉部界
東南至諾尼阿部界

西南至黑海
西北至明哥里部界

明哥里

臣秋濤謹案明哥里高加索路所屬九部中之一部也全志所載同此名志略備考並作明哥勒里亞皆一地也備考曰明哥勒里在亞細亞洲之西東至義米勒多地西枕黑海南接日爾日亞地北界西爾加西亞地長約五百里寬約一百五十里煙戶約十萬口境內岡陵接連絡繹不絕樹林居多隴畝無幾果木茂盛禽獸充

斥土產絲酒極爲紛繁首部名宋鼻的全志曰
明哥里民庶而貧專以販鬻男女爲利云嘉慶
年間未設部落道光初年爲南新藩道光末年
隸高加索路

全境八到

東至薩加社部界
南至義米勒多部界

西至黑海
北至高加索部界

東北至高加索部界
東南至薩加社部界

西南至黑海
西北至亞巴西亞部界

是爾彎

臣秋濤謹案是爾彎高加索路所屬九部中之

一部也志略備考全志所載並同此名本屬波斯國地志略曰波斯之極西北曰義蘭一作伊蘭又作倚蘭背負裏海前阻連山襟原衍沃林密草芳河流足資灌溉耕牧皆宜又曰義蘭在西域最著名昔有大城極富庶今廢四裔考謂愛烏罕取默沙特諸部於伊蘭伊蘭卽義蘭乃波斯北部著名大城其爲指波斯無疑按義蘭聲與是爾彎相近診察方隅亦相符合實卽一

地備考曰是爾巒在亞細亞洲之西緯度自赤道北三十八度四十分起至四十一度三十八分止經度自佛郎西國東四十二度四十分起至四十七度三十九分止東枕加斯比約海西連日爾日亞地南接白爾西亞國北界達日斯丹地東西相距八百里南北相距五百里地面積方約一萬二千二百里煙戶一億五萬口境內岡嶺層疊峯巒參天冰雪凝積永弗融化田土膏腴穀果豐登禽獸充牣草木茂盛地氣溫

和四季相適技藝庸常貿易蕭疎首部名巴古
有火田石漿溢滿地氣焦灼波斯之敬火者昔
皆來此朝拜焉嘉慶年間未設部落道光初年
爲南新藩道光末年隸高加索路

全境八到

東至裏海
南至波斯國界

西至日爾日亞部界
北至日爾日亞部界

東北至納希斯丹部界

東南至波斯國界
西南至波斯國界
西北至日爾日亞部界

諾尼阿

臣秋濤謹案諾尼阿高加索路所屬九部中之一部也總記志略所載並同此名志略云一作額里內府圖裏海之西有額里旺城卽此南懷仁圖裏海之西有亞兒墨泥亞備考作亞爾美尼亞全志作亞爾美尼皆一地也其地乃高加索山之陽初本一部後分爲二南偏屬土耳其北偏屬波斯國北偏又名黑里彎卽額里旺之音轉元憲宗時諸王旭烈兀西征取乞里彎國當卽此地巖巒盤互萬木參天山深多鑛隸

波斯有年因波斯國王與俄羅斯交兵徵國中
年不及壯之丁盡入行伍諾尼阿人憤怨背叛
原欲自制方面不意復爲俄羅斯所得建爲諾
尼阿部時乾隆末年猶有數部落屬於波斯至
道光八年乃全歸俄羅斯轄小部落二十土番
壯勇而女多美戶口三千餘萬習額利教者大
半習馬哈墨回教者僅小半其俗權貴之家御
僕殘刻無論田之磽沃倍額收租不恤耕奴凍
餒故赤貧甚眾劫掠四出雖良農負耒而耕亦

必手械自衛貧民多販鬻子女爲奴婢民俗悍
獷甚於薩加社特付里斯首部落也俗舊淳樸
今漸華靡有習武館軍製庫互市蕃盛備考曰
亞爾美尼亞屬厄羅斯者又名黑里彎東北界
日爾日亞地西連土耳其亞國南接白爾西亞
國長寬皆約七百三十里地面積方約九千九
百里煙戶一億六萬口臣秋濤謹案備考所載
戶口之數與總記不同
未詳境內岡陵平原互相間隔田土肥饒穀果
孰是豐茂地氣溫和人物咸宜西北地名黑里彎首

部亦曰黑里鬱東南地名那各斯齊鬱首部亦
曰那各斯齊鬱臣秋濤謹又案志略以諾尼阿

本屬土耳其後稱兵叛土俄羅斯征服之收爲
藩部蓋不知諾尼阿卽亞爾美尼亞分屬土耳
其波斯兩國俄羅斯所取者乃波斯之舊屬非
土耳其之舊屬也志略又曰土耳其國亞爾美
尼亞一作亞麥尼在古爾的斯丹美索不達迷
亞兩部之北阿臘山在其境內峯壑險峻洞峽
幽深水漲則巨舟泊於峯當雲擾時其地被兵

絕少故戶口較他部獨繁其民半奉耶蘇教勤
於商賈家有恒產會城曰黑爾斯倫一作葉西
倫地氣寒甚七月中卽見雪巴牙息在山腳居
民之學館也平地近河曰地里北客城與鄰國
通商山內古耳得族建堡於洞壑之間素爲盜
巢云云是卽土耳其之屬部名同而地異者合
而考之可證其非一地已乾隆末年諾尼阿爲
俄羅斯南新藩五部之一道光初年爲南新藩
八部之一道光末年屬高加索路

全境八到

東至日爾日亞部界
南至土耳其國界

西至黑海

北至日爾日亞部界

東北至日爾日亞部界

東南至波斯國界

西南至土耳其國界

西北至義米勒多部界

納希斯丹

臣

秋濤謹案納希斯丹高加索路所屬九部中
之一部也總記所載同此名志略作達日斯丹

備考作達爾斯丹全志作達其但皆一地也元

史記西北地名有的希斯丹卽此總記云納希

斯丹部東界裏海南界巴社西界諾尼阿北界
薩加社近海岸土膏沃領小部落十有三備考
曰達爾斯丹緯度自赤道北四十度三十三分
起至四十三度四十八分止經度自佛郎西國
東四十三度三十分起至四十六度四十分止
東枕加斯比約海西連西爾加西亞日爾日亞
二地南接是爾彎地北界高加索會城長約九
百三十里寬約二百二十里地面積方約一萬
二千里煙戶二億六萬口境內崇山峻嶺絡繹

不絕湖河甚多田土肥厚穀果豐茂葡萄等類
不植自生禽獸蕃衍鱗介充斥土產錫鐵硫磺
等物地氣不一冷熱互異技藝蕭疎貿易清淡
首部名沾巴嘉慶年間爲南新藩道光末年隸

高加索路

全境入到

東至裏海
南至日爾日亞部界

西至日爾日亞部界

北至薩加祉部界

東北至裏海
東南至是爾彎部界

西南至日爾日亞部界

西北至薩加祉部界

亞巴西亞

臣秋濤謹案亞巴西亞高加索路所屬九部中之一部也志略備考所載並同此名全志作古里利實一地也備考曰亞巴西亞緯度自赤道北四十二度三十分起至四十四度四十五分止經度自佛郎西國東三十四度四十八分起至三十八度二十一分止東至明哥勒里亞地西連西爾加西亞地南枕黑海北界高加索山長約八百餘里寬約五百里煙戶一億九萬餘

口境內岡陵居多平原間隔田土鹽腴穀果極豐烏獸草木靡弗蕃衍土產蠟蜜熟皮等物地列二名一曰大亞巴西亞諸酋統攝各分部落一曰小亞巴西亞隸厄羅斯國兼攝道光初年爲南新藩道光末年隸高加索路

全境八到

東至高加索部界
南至黑海

西至黑海
北至高加索部界

東北至高加索部界
東南至明哥里部界

西南至黑海
西北至阿索富城界

薩加社

臣秋濤謹案薩加社高加索路所屬九部中之一部也總記志略所載並同此名志略云一作色爾各設一作額勒阿西又云薩加社諾尼阿日爾日三部近年又分爲八部一曰西爾加西亞備考亦有西爾加西亞部覈其方隅則西爾加西亞卽薩加社譯字偶殊實一地也總記曰薩加社部境內崇山峻嶺最高曰高加薩斯山千三百二十丈終年積雪土不饒而宜麥領小

部落十有四首部曰摩斯諾設有礮臺地極崎
嶇自俄羅斯闢山石造橋梁五年始成設總領
一人及玉士領千五百名玉士領武官也所乘
馬皆雄壯善走兵器弓矢鳥銃甲堅能禦銃彈
所有奴僕分二等一備戰陣一司耕作其備戰
陣之奴僕多至萬人修偉趨捷女多妍麗出則
以布蒙面而躡木屐童女則皮束下體釘以銀
扣俟嫁時夫親釋之生兒女三四歲親朋即抱
去撫育教習事業無異親生男至堪臨陣女至

可婚配始還其父母謂親自鞠養恐其溺愛也
機士臘小部落瀕氏力河市埠萬家而都魯機
之阿敏阿人十居七八產絲髮及酒志略曰阿
斯達拉干之南曰薩加社在高加索山之陰種
人居巖谷不事耕作貧甚而性特悍猛習於剽
剝鄉皆土堡自練丁壯爲兵梗令揭竿時時有
之峩軍收捕往往挫衄僅羈縻以固邊圉不能
使之馴擾也備考曰西爾加西亞緯度自赤道
北四十一度五十二分起至四十五度十一分

止經度自佛郎西國東三十四度二十分起至
四十四度四十五分止東枕加斯比約海暨達
日斯丹地西界黑海南接日爾日亞地北連高
加索山長約二千里寬約五百里地面積方約
二萬七千七百三十里烟戶二億六萬餘口境
內岡陵層疊峯巒參天冰雪凝積永弗融化湖
河甚多灌溉田畝稼穡甚茂種植適宜土產穀
果絲棉禽獸鱗介等物地氣互異平原溫和高
陵寒凜地列兩名一曰大加巴爾達一曰小加

巴爾達嘉慶年間爲南新藩道光末年隸高加索路

全境八到

東至裏海

南至日爾日亞部界

西至明哥里部界
北至高加索部界

東北至高加索部界
東南至納希斯丹部界

西南至義米勒多部界
西北至明哥里部界

朔方備乘卷十七

拔貢張惇德初校
舉人張銓覆核